

# 全宋詩輯補

湯華泉 輯撰

第三冊

黃山書社

全宋詩  
卷之三

# 全宋詩輯補

湯華泉

輯撰

第三冊

黃山書社



“十二五”國家重點出版規劃項目  
本書出版得到國家古籍整理出版專項經費資助  
安徽大學“211工程”三期經費資助

想生頌

密密潛行世莫知，個中已是涉多歧。  
如燈焰焰空紛擾，急急歸來早是遲。

相生頌

法不孤生仗境生，纖毫未盡遂崢嶸。  
回光一擊便歸去，幽鳥忽聞雙眼明。

流注生頌

塵塵聲色了無窮，不離如今日用中。  
金鎖玄關輕掣斷，故鄉歸去疾如風。  
《人天眼目》卷四。

爲釋道明頌語

指將林際參黃檗，接得雲門嗣雪峰。  
《永樂大典》卷八七八二引《嚴州府志》。

釋元祐

〇七九一三

洪州黃龍山慧南禪師法嗣。

偈

道林一語，千聖齊舉。字字無差，不敢相許。正當劫火洞然，但看鵝王擇乳。

示寂偈

今年六十六，三處因緣足。夜半火燒山，跳入火中浴。《建中靖國續燈錄》卷一三。

頌古

文殊師利在靈山會上諸佛集處，見一女子近佛坐入於三昧。文殊白佛云：『何此女得近佛坐？』佛云：『汝但覺此女。』令從三昧起，『汝自問之。』文殊繞女子三匝，鳴指一下，乃至托上梵天，盡其神力而不能出。佛云：『假使百千文殊，亦出此女定不得。下方過四十二恒沙國土有罔明菩薩，能出此女』

定。』須臾罔明至佛所，佛敕出此女定，罔明即於女子前鳴指一下，女子於是從定而出。

百千文殊出不得，罔明不費纖毫力。落霞與孤鶩齊飛，秋水共長天一色。《禪宗頌古聯珠通集》

卷三。

經首題八字，昔有僧問地藏琛和尚：『以字不成，八字不是。未審是甚麼字？』地藏曰：『看取下注脚。』

我佛金言義海深，開遮唯要悟真心。首標妙在當頭札，密使泥牛曉夜吟。同上卷四。

二祖慧可大師，初至少林，參承達磨，立雪斷臂，悲淚求法。磨知是法器，乃曰：『諸佛最初求道，爲法忘形，汝今斷臂，求亦可在。』祖曰：『諸佛法印可得聞乎？』磨曰：『諸佛法印不從人得。』祖曰：『我心未寧，乞師安心。』磨曰：『將心來與汝安。』祖曰：『覓心了不可得。』曰：『與汝安心竟。』祖於此悟入。

覓心不可得，處處逢知識。無用一雙眉，同渠超百億。同上卷七。

杭州烏窠道林禪師，初詣長安西明寺學華嚴，唐代宗詔國一禪師至闕，乃謁之，得法。歸於西湖秦望山，有長松，枝葉繁茂，盤屈如蓋，遂栖止其上，故以爲名。有侍者會通，乃唐德宗六宮使，棄官從師落髮，伏

勤數年，未蒙印授。一日告辭。師曰：『往甚處？』通曰：『往諸方學佛法去。』師曰：『若是佛法，老僧亦有少許。』曰：『如何是和尚佛法？』師拈起布毛吹一吹，通於言下大悟，更不復他游，乃居左右。後開法爲的嗣，或號布毛侍者。

無風匝匝起波痕，碧髻羅紋正眼觀。恰值黃河三凍鎖，那羅延窟見龍蟠。同上卷八。

趙州因僧游五臺問一婆子曰：『臺山路向甚麼處去？』婆曰：『驀直去。』僧便去。婆曰：『好個師僧，又恁麼去。』後有僧舉似師，師曰：『待我去勘過。』明日師便去問：『臺山路向甚麼處去？』婆曰：『驀直去。』師便去。婆曰：『好個師僧，又恁麼去。』師歸院謂僧曰：『臺山婆子爲汝勘破了也。』

勘破不勘破，婆子能招禍。直饒千眼補陀人，也是大蟲看水磨。同上卷一八。

趙州因學人問：『乍入叢林，乞師指示。』師曰：『吃粥了也未？』曰：『吃粥了也。』師曰：『洗鉢盂去。』其僧忽然省悟。

粥了尋常洗鉢盂，奈何依樣畫葫蘆。靈光洞徹河沙界，是則名爲大丈夫。同上卷一九。

福州靈雲志勤禪師初在馮山，因見桃花悟道，有偈曰：『三十年來尋劍客，幾回落葉又抽枝。自從一見桃花後，直至如今更不疑。』



蠢動含靈同一性，山河大地盡知音。昔人解道黃鶯道，似共桃花說舊心。同上卷三三。

澧州洛浦山元安禪師久爲臨濟侍者，一日辭去，濟升堂曰：『臨濟門下有個赤梢鯉魚，搖頭擺尾向南方去，不知向誰家蓋瓮裏淹殺？』師游歷罷，直往夾山卓庵，經年不訪夾山。山修書令僧馳往，師接得便坐却，再展手索，僧無對。師便打曰：『歸去舉似和尚。』僧回舉似，山曰：『這僧若開書，三日內必來。若不開書，斯人救不得也。』師果三日後至，見山不禮拜，乃當面叉手而立。山曰：『鷄栖鳳巢，非其同类，出去！』師曰：『自遠趨風，請師一接。』山曰：『目前無闍黎，此間無老僧。』師便喝，山曰：『住，住，且莫草草匆匆。雲月是同，溪山各異，截斷天下人舌頭即不無，闍黎爭教無舌人解語？』師仁思，山便打，因茲服膺。

執侍巾瓶二十年，搖頭擺尾出林泉。悠悠直往南方去，蓋瓮淹來得穩眠。同上卷二七。

雲門因僧問如何是超佛越祖之談，師曰：『糊餅。』

韶陽糊餅答禪人，佛祖之談道最親。不落言詮休擬議，回頭識取自家珍。同上卷三三。

劉摯

○七九一五

句

莫沉杜預閑碑石，剩倒山翁醉接羅。  
《輿地紀勝》卷八二《襄陽府》。

晏幾道

○七九九九

句

應作巫陽春夢句。  
《後村千家詩》卷一六聞人祥正《集句》。

孔夷 〇八〇〇二

郢州

蒼茫遺佩憐交甫，零落清歌莫送愁。  
《記纂淵海》卷一三郢州。

梨花

共借梨花作寒食。  
《全芳備祖集》前集卷九。

梨花

砌下梨花一堆雪，雨暗梨花春自光。  
《佩文齋廣群芳譜》卷二七。

句

楊柳不遮春色斷，一枝紅杏出牆來。  
《書齋夜話》卷四。

全宋詩已收作者補

沈括

〇八〇〇八

懼庵

清江繞檻白鷗飛，坐看潮痕上釣磯。松菊未荒元亮徑，芰荷先製屈平衣。窗前楓葉曉初落，亭下鱸魚秋正肥。安得從君理蓑笠，棹歌相趁入烟扉。《吳郡志》卷一四。《全宋詩》收作沈某。

句

不見連昌桃，無言紅簌簌。《王荆公詩注》卷三一《季春上旬苑中即事》注引。

蔣之奇

〇八〇二〇

謝大智元照律師開講

心淨佛土淨，境空無一毫。風柯響林薄，華雨積庭皋。說法龍象繞，放生鱗羽逃。知師精戒律，功行不唐勞。《芝園遺編》卷下。

贈徐神翁

持帚掃諸塵，經今三十春。憐渠獨行意，雌靜不先人。《虛靜冲和先生徐神翁語錄》卷上。

贈僧宗敏

每受楞嚴學，孤山最有聞。

贈僧蘊齊

道人重演蓮華教，佛隴家風好諦聽。《釋門正統》卷六。

贈高麗僧義天

妙達顯空中，一通無不通。寄語定光莫招手，道場方盛鎮遼東。同上卷八。

蕭相樓

紫嵐千嶂寒，清溪百里碧。公名山水俱，芬芳永無極。《輿地紀勝》卷二池州。

籍田

規地餘千畝，三推示勸耕。廩犧猶故宇，潑麥有新楹。日至土膏動，雪消泉脉生。城中若羈束，野徑得閑行。同上卷三一吉州。末句《全宋詩》據宋釋紹嵩《江浙紀行集句詩》作零句收入。

## 泉州

四門唐翰墨，十室晋衣冠。同上卷一三〇泉州。

## 天水湖

靈源符國姓，麗澤應州名。地脉熏來潤，雲根出處清。《明一統志》卷三五鞏昌府。

## 升仙臺

主臺猶在碧山層，想象真仙爲勉登。况是仙風久傾偈，何當騎鹿共飛升？同上。《記纂淵海》卷二五「主臺」作「重臺」。

## 騎石山

突星疑落星，騎石如騎馬。同上卷四三衢州。

龍潭雲居謠

白雲起於東西之龍潭。同上卷五二南康府。

慶陽府

陝右號名郡，慶陽乃雄鎮。臨杼多時才，結構甚閎峻。城端聳華閣，千里歸一瞬。不啻陵廟存，其旁接烽燼。人家住深崦，檐瓦俯可認。陶穴尚遺風，前書自傳信。俯窺鵝池泉，竊黑深萬仞。黃流繚如帶，漱激似湍迅。地險誠在茲，賊騎安可近？《記纂淵海》卷二四。

過郿縣懷古二首

蜀相揚聲欲取郿，關中形勢已全窺。當時不是長星隕，席捲中原未可知。  
據險先取五丈原，駐兵分闢渭南田。諸軍未得全無事，天下奇材始信然。雍正《陝西通志》卷九七。



## 自琴高臺入岩籟洞至白額山

我從水西歸，主人遠送別。相招人岩籟，窈如龍蛇穴。棟宇藏其中，佛像亦肅設。深行苦暗冥，薪炬煩屢爇。是時頗蒸潤，兩足惟恐蹶。門前琴溪水，萬疊碎明月。細石似團珠，峭壁立積鐵。琴高昔所釣，突兀見遺碣。巨石穹龜趺，聳首何崛嶮。上有杜偉詞，文字半漫滅。賢哉武平一，幽賞亦窮挾。當時賜花人，片葉嗟涸轍。短篇刻岩間，詞翰自雙絕。百年始有逢，盛事人傳說。顧余勞生者，單車幸茲歇。何當遂岩栖，永與世人訣。

## 水西

李杜沒已久，水西生塵埃。何人繼其迹，幸與夫子陪。維舟白雲潭，即上遺民臺。永懷柴桑令，固是閔達才。終乃持釣竿，榮利不入懷。青松共高爽，白石同徘徊。嵯峨東峰亭，新構皆珍材。當時報捷書，曾此持酒杯。遺墨幾散佚，重爲開瓊瑰。季公亭亦存，故基壓崔嵬。事載開成詩，作者其姓裴。朽壤新掘獲，字迹昏蒼苔。中有乾應塔，昔從欒峰來。冒月過山脊，常爲二虎偕。終焉此寄迹，歸骨茲山隈。茗叢不知數，嫩綠緣兩崖。鷗鷗戲溪澗，馴狎不用媒。西行過崇慶，長廊繚縈回。灑然秋霜閣，勝境茲爲魁。雙流合一澗，淙射相喧豨。